

**BOSNA I HERCEGOVINA  
FEDERACIJA BOSNE I HERCEGOVINE  
VLADA**

**PRIJEDLOG**

**ZAKON  
O IZMJENAMA ZAKONA O POMILOVANJU**

**Sarajevo, juni 2014. godine**

## **PRIJEDLOG ZA DONOŠENJE ZAKONA PO HITNOM POSTUPKU**

**Predlažemo donošenje Zakona o izmjenama Zakona o pomilovanju po hitnom postupku, obzirom da su u konkretnom slučaju ispunjeni uslovi iz člana 191. stav 2. Poslovnika Predstavničkog doma Parlamenta Federacije Bosne i Hercegovine ("Službene novine Federacije BiH", br. 69/07 i 2/08) i člana 186. stav 2. Poslovnika o radu Doma naroda Parlamenta Federacije Bosne i Hercegovine ("Službene novine Federacije BiH", br. 27/03 i 21/09).**

**Naime, odlukom Ustavnog suda Federacije Bosne i Hercegovine, broj: U-34/10 od 08.10.2013. godine ("Službene novine Federacije BiH", broj 3/14), utvrđeno je da dio zakonskog teksta u čl. 2. i 3. nije u saglasnosti sa Ustavom Federacije Bosne i Hercegovine. Kako bi navedena odluka bila ispoštovana u propisanim rokovima, predlaže se razmatranje ovog zakona po hitnom postupku.**

**Z A K O N**  
**O IZMJENAMA ZAKONA O POMILOVANJU**

Član 1.

U Zakonu o pomilovanju („Službene novine Federacije BiH“, broj 22/09), u članu 2. druga rečenica, briše se.

Član 2.

U članu 3. iza riječi „genocida“ zarez i riječi: „niti za lica koja su ranije dobila pomilovanje po ranije izrečenoj i izdržavanoj kazni zatvora“, brišu se.

Član 3.

Ovaj zakon stupa na snagu narednog dana od dana objavljivanja u „Službenim novinama Federacije BiH“.

## **O B R A Z L O Ž E N J E**

### **ZAKONA O IZMJENAMA ZAKONA O POMILOVANJU**

#### **I. – USTAVNI OSNOV**

Ustavnopravni osnov za donošenje ovog zakona sadržan je u odredbama člana IV. A. 20. (1) d) Ustava Federacije Bosne i Hercegovine. Naime, prema odredbama člana IV. A. 20. (1) d) Ustava Federacije BiH, Parlament Federacije BiH nadležan je za donošenje Zakona o vršenju funkcije federalne vlasti, iz čega proizilazi da navedena odredba predstavlja ustavnopravni osnov za njegovo donošenje.

#### **II. – RAZLOZI ZA DONOŠENJE ZAKONA**

Ustavni sud Federacije Bosne i Hercegovine donio je presudu, broj: U-34/10 od 08.10.2013. godine, kojom je utvrđeno da član 2. Zakona o pomilovanju („Službene novine Federacije BiH“, broj 22/09), u dijelu koji glasi: „Prije donošenja odluke, Predsjednik će obaviti konsultacije sa zamjenicima Predsjednika Federacije Bosne i Hercegovine“ i član 3. u dijelu koji glasi: „niti za lica koja su ranije dobila pomilovanje po ranije izrečenoj i izdržavanoj kazni zatvora“, nisu u saglasnosti sa Ustavom Federacije Bosne i Hercegovine. Naime, u obrazloženju presude navedeno je, da je Ustavni sud Federacije BiH pošao od činjenice da je u skladu sa članom IV.B.3.7. a) (VI) Ustava Federacije Bosne i Hercegovine, pored ostalih nadležnosti Predsjednik Federacije BiH, nadležan za davanje pomilovanja za kaznena djela propisana federalnim zakonom osim u slučajevima ratnih zločina, zločina protiv čovječnosti i zločina genocida. U skladu sa navedenim, Ustavni sud ističe da iz navedene odredbe proizilazi, da je akt o pomilovanju kao akt milosti utvrđen kao isključiva nadležnost Predsjednika Federacije za određena kaznena djela utvrđena federalnim zakonom, bez prethodne saglasnosti, odnosno konsultacija bilo koje institucije vlasti. Dalje se navodi, da konsultacija kao oblik saradnje među organima ne može utjecati na donošenje konačne odluke koju treba da donese Predsjednik Federacije BiH, osim ako to nije propisano Ustavom Federacije BiH. Obzirom da je članom 2. Zakona o pomilovanju, Predsjednik Federacije BiH obavezan izvršiti konsultacije sa zamjenicima Predsjednika, Ustavni sud je utvrdio da navedena odredba nije u saglasnosti sa odredbama Ustava Federacije BiH, jer prema ustavnim odredbama u isključivoj nadležnosti Predsjednika Federacije je da donosi odluku o pomilovanju, te se zakonskim odredbama njegovo pravo ne može ograničiti.

Kada je u pitanju osporeni član 3. Zakona, koji reguliše da se pomilovanje ne može dati licima koja su ranije dobila pomilovanje po izrečenoj i izdržanoj kazni, Ustavni sud Federacije BiH smatra da ista odredba proširuje krug lica koja ne mogu dobiti pomilovanje, a što nije u saglasnosti sa članom IV.B.3.7. a) (VI) Ustava Federacije Bosne i Hercegovine.

### **III. - OBRAZLOŽENJE PREDLOŽENIH ZAKONSKIH RJEŠENJA**

Čl. 2. i 3. Prijedloga zakona o izmjenama Zakona o pomilovanju vrši se brisanje dijela zakonskog teksta koji je presudom, Ustavnog suda Federacije Bosne i Hercegovine, broj: U-34/10 od 08.10.2013. godine, proglašen neustavnim.

### **IV.- FINANSIJSKA SREDSTVA**

Za provođenje ovog zakona nije potrebno osigurati dodatna sredstva u Budžetu Federacije Bosne i Hercegovine.

## **ODREDBE KOJE SE MIJENJAJU**

### **ZAKON O POMILOVANJU**

#### **Član 2.**

Pomilovanje daje predsjednik Federacije Bosne i Hercegovine. Prije donošenja odluke, predsjednik će obaviti konsultacije sa potpredsjednicima Federacije Bosne i Hercegovine.

#### **Član 3.**

Pomilovanje se ne može dati za krivična djela ratnog zločina, zločina protiv čovječnosti i zločina genocida, niti za lica koja su ranije dobila pomilovanje po ranije izrečenoj i izdržavanoj kazni zatvora.